

中國方志叢書·華中地方·第一二九號

據

清·張紹棠修，蕭穆纂
光緒三十年刊本

影印

江蘇省

續纂句容縣志

(六)

成文出版社有限公司印行



10096427

中華民國六十三年六月臺一版

續纂句容縣志

全六冊

發行人：黃

成助

出版者：成文出版社有限公司

台北市郵政信箱二二六〇五號

台北市羅斯福路三段二四〇巷五號

印刷者：成文出版社有限公司

內政部登記證內版台業字第一一四七號

續纂句容縣志卷十八下

邑人張 鑑分篇

藝文 文

解官表

梁 陶宏景 通明

臣聞堯風冲天穎陽振飲河之談漢德括地商陰峻餐芝之氣
臣棲遲早日簪帶久年仕豈留榮學非待祿恆思縣纓象闕孤
耕壟下席月澗阿橫琴雲際始奉中恩得遂邱壑今便滅影桂
庭神交松友一出東關故鄉就望睠言興念臨歧瀉淚臣舟棹
已邁無緣躬詣不任攀戀之誠謹奉表以聞

授門弟子陸敬游十賁文

陶宏景

隱居先生遣總事弟子戴垣秉策執簡膝授前學弟子吳郡陸
敬游建連石之邑爲棲靜處士策文曰咨爾敬游昔我紆綬帝
闈持笏梁席雖迹混教塗而心標逸境芝田之想無忘曉夜濠

原稿不清

穎之志歲月已深至德有輝風雲相會爾之來也受移兩春於是褫帶青墀掛冠朱闥拱手東驅創居茲嶺疏澗通水徙石開基登崖斷幹越壟負去萬力盡於營築氣血疲乎趨走肌色憔悴不以暴露爲苦心雖全備寧願飢寒之弊棟宇既立載罹霜暑於時七稔經始甫訖今日之安爾有勤焉君子不獨居其榮仁人必與物同泰是用邑兩長阿比阪積金山連石之鄉方七十步澗水屬焉茂爾嘉業永爲華陽上賓爾其蒞之其一爾以誠慤爲性恬澹爲情質直爲本沈潛樹志不遺世才高謝接俗權謀詭誦非意所欲今故營爾爲棲靜處士可謂因德立號克終斯美其二爾基架館境營割援垣堂壇宏敞樓路通嚴官私行止並有棲憩繕築之勞莫匪爾力今故營爾爲雷飛軒廂廊側屋可以安身靜臥顯祇遐福其三爾奉上惟勤接下以惠稼

稽艱難備嘗勞苦貨殖之宜允贍糧服手足胼胝未獲告休
風沐雨於焉尤切今故賚爾蒼頭一人厥名多益可以傳代薪
水省息劬劇其四爾族惟舊緒身乃邦聞道雖一貫事望宜分
今故賚爾銅鐵如意可以揮對賓僚卽名立事其五爾崇教惟
善法無偏執器服表用爰寄玩習今故賚爾筇竹錫杖可以振
動三界精祇憚響其六爾期誠元契遐想靈風至懷所詣因心
則通今故賚爾香爐一枚熏陸副之可以騰煙紫閣昭感上司
其七爾澡形潔臟肴糧旣去宣導松朮實資芳醕今故賚爾杯
盤一具可以夕挹桂漿朝承菊露其八爾敬事經誥遵尙楷模
翰墨之用於是乎在今故賚爾大硯一面紙筆副之可以臨文
寫字對眞受言其九爾貞心內固清行外彰滌蕩紛穢表裏雪
霜今故賚爾鍤石澡灌手巾爲副可以登齋朝拜出入盥漱其

今賚爾十事事準前史可以對揚嘉策循言求理無或驕情
以騫斯旨援筆申懷敢告處士

上隱居書

沈約休文

先生糠粃流俗超然獨遠領袖霓羽總轡雲霞方當名書絳闕
身游元關憑星夕臥望日朝餐而至理深微曖然難覩雖欲下
風問道未知厥路若夫棲遲閒遠咀嚙瓊芝出入清都師友靈
聖循崖返跡無缺惟心

謝隱居賚術煎啟

庾肩吾

竊以綠葉抽條生於首峯之側紫花縹色出自鄭岩之下山精
見書華神在籙術榮人謝盡採擷之難啟旦移申窮的瀝之劑
故能競爽雲珠爭奇水玉百邪外禦六府內充自非身疲掌硯
役倦攀桃豈可立致遐年坐生羽翼臨沅丹井方覺可捐酈縣

菊泉無勞復汲庶得遨游海岸追涓子之塵馳驚霍山共陳王
爲侶淫俗輕施尙曰難酬出世鴻恩甯知上報

寶公贊

唐李太白

水中之月了不可取虛空其心寥廓無主錦幪烏爪獨行絕侶
刀齊尺梁扇迷陳語丹青聖容何住何所

寶公贊

僧皎然

大地之動我安其中高景無氛靈鶴在空出生死海隨物有終
勢形駭俗借繪開蒙嘗攜刀尺精意誰通

生芝草表

李含光元靜

臣含光言竊見紫陽觀東隱居先生舊合丹所忽生芝草八十
一莖形狀瓌奇光采秀麗根憑松石氣鬱蘭茝斯實曠代希有
當今罕見伏惟陛下推誠洞府展敬無虧瞻言紫陽載興修葺

是以神物繁殖用表吉祥凡與知聞僉云聖德所感莫不喜悅
臣不勝欣躍之至謹遣楊慎奢先奉表以聞今圖寫芝形委曲
詳辨事畢之日別差使上聞天寶七載五月二十日

降甘露表

前人

前所奏請紫陽觀東鬱岡山石奉修齋醮自六月二十七日起
首行道至本月七日冬至日初出時緣是齋人及中使齋令誦
等咸見齋壇四遠松樹悉有甘露其色白其氣香其味甘其松
去壇漸遠者而甘露亦漸少計今凡降甘露松樹都有二百三
十株謹按道德經稱天地相合以降甘露人莫之令而自均焉
元聖著經以爲嘉瑞齋醮遇此又爲吉祥敢不以聞謹奉表供
進甘露二合天寶十一載十一月

絳巖湖記

邑人樊珣縣令

句容西南三十里曰赤山天寶中改爲絳巖山以文變質也
山外周流厥有湖塘舊址考於前志則曰吳人創之梁人通之
矣泊金火有變積爲習坎灌莽之所我唐麟德歲邑宰楊嘉延
亦纂前服利農爲名雖迹於傳聞而事斯茫昧楊氏之後今餘
百年實蒞菰蒲莫植粳稻剝極則賁俟能而伸大厯十二祀縣
大夫兼大理司直太原王公昕能蘇罷勞一作人且易弊俗臨湖
而歎以欲從人吟使臣之清風酌良牧之高誼將圖永逸匪顧
暫勞因察其地形訪以輿誦謀始作則庀徒撰工月在休農雲
其荷鍤周匝百頃一作里蓄爲湖塘置兩斗門用以爲節旱暵則
決而全注霖潦則瀦而不流收功濟時道甚明遠開田萬頃瞻
戶九鄉泊成奧區頗無凶歲魚稻之盛公實爲之昔叔敖芍陂
能張楚國史起漳水竟富魏邦秦稱鄭白漢歌邵杜皆謂是也

每商羊起舞龍見而雩比屋有憂於銷鑠連阡莫覩於耘耨我
則黛波瀟淪白鳥飛滅下洞庭之鳬雁泳中流之鱸鮓橫壙之
右構爲新亭芬其芰荷樹以杞柳楊楚江嶺憧憧是途行李實
獲於蔭麻詠歌或藉於觀覽懿乎哉君子之用心也孰愈崇其
島榭侈以林堂此而莫文翰墨奚述大厯十二年十月三日記

建康實錄序

邑人許嵩

司馬子長善敘事古稱良史然班固嫌其疏略是非頗謬於聖
人言論數篇以爲所蔽嵩述而不作竊思好古今質正傳旁採
遺文始自吳起漢興平元年終於陳末禎明三年而吳黃龍以
前雖引漢厯二十餘年其實吳之首事及晉平吳太康之後三
十餘載復涉西晉之年泊瑯琊東遷太興卽位元年始爲東晉
首年東晉一十一帝一百二年而禪於宋宋八帝六十年而禪

於齊齊七帝二十四年而禪於梁梁五帝五十六年而入於陳
陳五帝三十三年止隋開皇元年陳建首號梁之末年梁稱元
年齊之季年齊初卽位宋之餘年則四家終始共用三年而吳
四帝五十九年南朝六代四十帝三百三十一年并吳首事之
年總四百年閒著東夏之事勒成二十卷名曰建康實錄具六
朝君臣行事事有詳簡文有機要不必備舉若土地山川城池
宮苑當時制置或互興毀各明處所用存古蹟其有異事別圖
辭不相屬則皆注記以益見知使周覽而不煩約而無失者也

虞部員外郎史館修撰張緯可句容令

南唐廣陵

徐

鉉

鼎臣

勅爲政之要在乎安民長人之吏在乎慎選故吾用古道擇尙
書郎而命之某官張緯學問該通辭藝精絕自東朝載筆石室
抽文朝論藹然以爲名士矧又洞識理體周知物情是爲通才

何適不可王畿大邑既庶而富藉爾敏惠爲吾教之仍假臺郎以申朝獎苟聞報政豈恡加恩可

送張秘郭賁二先輩序

徐鉉

君子所以章灼當時焜耀來裔者必曰進士擢第畿尉釋褐斯道也中朝令法雖百王不移者也自聖歷中興百度漸貞能興此美者今始見張郭二生矣則知九仞之勢千里之行凝雲逐日未可量也鉉也不佞生於先賢之後進在二子之前此美不兼可以歎息然有事同而時異請試論之噫詞場墮廢五十年矣故老之言議殆絕後生之視聽惜然今百辟有司達於郡國吏徒見趨走公府中一尉耳焉知其餘哉而二君子調高才逸年少氣盛將以俊造之業自重責人以既廢之禮又將以堯舜之道爲用議政於俗吏之間如將與時大乖矣嗚呼彼眾我

寡難以勝乎君子之道無施不可舒之彌四海卷之在掌握日
殫見奇於牧馬元揚知名於水磴彼二人卽公輔大器也豈以
耻辱爲累哉愚願二君子反己正身開懷戢耀無望人以不知
無強人以不能如斯而已矣今天子重文好古諸生懷才待用
所以蒼生未蒙福者上下之勢殊中有閒爾大易之義物不終
否否極必泰泰之時在上者其道下降在下者其道上行君臣
相合然後事業遠矣吾以爲斯道之復不遠吾子其勉之句曲
仙鄉廣陵勝地多難將弭春物將華琴棊詩酒足以爲適贈言
之旨盡於斯焉

進茅山元符觀頌表

宋 鮑慎辭 邑令

右臣所領邑居茅山之下元符觀實隸焉經營之際得以職事
自效於斤築之末因獲究見朝廷所以製作之本意臣愚不佞

恭惟皇帝陛下天神天明經緯萬事文德既暢武功亦昭上自京師下逮海表勝衣之子知研經術絃誦之音如昔鄒魯偏師西指闢國萬里名王貴人俘獻兩觀治功巍巍曠代未有至於懷柔百神盡誠備物靈貺昭答臣庶頌歎維元符之建實紹先志不惑於飛舉靈化之說無取於黃冶變幻之事清靜無爲深達道妙載營齋館以格真馭尊異高行風厲四方厯選列辟孰如今茲固宜仙聖睠懷蒙福無極瑞鶴翔集以示民信聞之邑人華陽自崇甯以來慶雲醴泉紫芝瑤草蓋多有之然可聞而不可見可見而不可致惟是瑞鶴之應上薄九霄萬目所瞻不得而掩臣前與部使者已具列上景命之符莫此驗白竊意羣公庶尹禮官博士因符瑞之旣富則六藝之可攷抗章而請有事於泰山梁父以繼七十二君之絕業以揚我祖宗之休功則

茲山之靈實兆厥祥臣觀古帝王既有殊尤特絕之績必有非常能言之士鋪張本末比次律呂勒之金石著在簡冊以光明於本朝臣游泳太平拭目盛事而惜未聞聲詩流播乃擇日齋戒沐浴撰成茅山元符觀頌一首詞義鄙淺無足簡錄而臣之區區厥有攸在倘蒙萬幾之暇俯賜乙覽以狂斐誅死臣所榮幸所有元符觀一本謹隨狀上進干冒宸嚴臣無任隕越兢慚跼踖俟命之至謹錄聞伏候勅旨

巫伋進講尙書制

王

洋東牟

某官某講筵高三侍之選藏壁出四代之文堯舜之治垂衣裳亶其稽古文武之政在方策可以驗今厥維儒宗宜備延訪以爾多見守約資深逢源憲臺持糾察之公諫省有彌縫之益入侍經幄詳問起辭諒學術之該通尤典謨之淹貫於五十八篇

之定舉大義以敷陳若十餘萬言之繁鑒空文之無補庶裨聖治日盼英猷

送衛汝積歸句曲詩序

金壇劉宰平園

汝積歸路過獨樓岡入亭子谷二處相去里許而下瞰數百里邱陵川澤如錯繡然谷中縈紆峭險下有流泉疑有幽人勝士嘗建樓岡上以極臨眺著亭谷中以貯幽勝以其亭多而樓獨故曰獨樓柳子厚所謂游之道二曠如也奧如也此蓋兩得之歲久樓傾亭廢而名尙傳若鐵壚步然山居皆樵蘇之人無能解其義者遂意獨樓爲體而以谷爲孔是又與小姑娘彭郎同義吁可歎也因汝積路出其間爲辨證以刷是岡之恥

茅山志自序

元劉大彬元應

句曲有記尙矣宋紹興二十年南豐曾惻孚仲昭臺道士傳霄

子昂修山記四卷所書山水祠宇粗錄名號而已考古述事則
猶略焉大彬登壇一紀始克修證傳宗經錄又五載而成是書
凡十二篇十五卷題曰茅山志載惟茲山稟靈異於開闢之初
應帝王於虛无之表夏禹巡幸秦始登崇漢元壽二年太帝九
錫茅君白日神仙其名益大顯於天下及晉宋經道之興梁唐
尊尙之篤真人道士代爲帝者師龍文鳳札積如雲霞慨乎年
世曠邈璽書罕存追錄見聞百餘一二暨我皇元混一區宇世
祖聖德神功文武帝首降明詔召嗣師蔣君宗瑛詣闕繇是累
朝大護其教迺延祐三載加號三君改觀三峯先掩前古聖人
以神道設教有自來矣作誥副墨第一加封明詔若曰茲山之
靈以氏爲號茅君真蹟蓋先傳焉按登真隱訣真傳例列聖道
君稱紀餘真稱傳夫以三茅秦漢道君今日下士仰述聖蹟何